

Date – 28/08/2025

Time – 07:30 Hrs

HEADLINES (MORNING)

1. Mizoram Assembly Fur thutkhawm tanni nimin khan Mizorama Forest (Conservation) Amendment Act hman turin pawm a ni.
2. Chief Minister Pu Lalduhoman Forest (Conservation) Amendment Act chu Mizoramin a hmang mek a, a hman zel a mamawh takzet a ni a ti.
3. Mizoram Legislative Assembly thukhawm chuan kutdawh khapna dan siam tur, Mizoram Prohibiton of Beggary Bill a pass.

<><><>

OFFICIAL RESOLUTION

Mizoram Assembly Fur thutkhawm tanni nimin khan Mizorama Forest (Conservation) Amendment Act hman turin pawm a ni.

Environment, Forests & Climate Change Department Minister Pu Lalthansanga Official Resolution putlulh Forest (Conservation) Amendment Act, 2023 (No.15 of 2023) stands applied to the whole of Mizoram" tih chu pawm a ni.

Pu Lalthansanga chuan he resolution hi sorkar hmasaah khan dodal a lo ni tawh a ti a, Forest (Conservation) Amendment Act, 2023 chuan Forest (Conservation) Act, 1980 chu siamthat a tum a, a thil tum ber chu India ramngaw leh biodiversity humhalh ruala hmasawna tluantling neih a ni a ti.

Opposition Leader Pu Lalchhandama Ralte chuan, kum 2 kaltaa he dan hi Mizoram tan a him lo tia Assembly a dodal a nih thu a sawi a, khatih laia Opposition Leader tuna House Leader in Mizoram tan a him tawkhlo tia nasa taka dodal a duh thu a lo sawi tawh a ni a ti.

Central-in Mizoram state chhunga ram te a duh ang anga a hman theih an remti lo tawh a, house chuan ram leh hnam tan a thatna tur anih chuan eptu lam nen lungrual taka an lo do tawh, tuna rorel lai ten tha ber anga sawia hman an tum ta hi sawifiah an phut tih a sawi a ni.

Opposition Leader Pu Lalchhandama Ralte chuan, house-a an tih tur, Resolution an sawiho tur pawh member ten an enlawk na hun tur pek an ni lo thin chu an lawm loh thu a sawi bawh a ni.

<><><>

OFFICIAL RESOLUTION-2

House Leader Pu Lalduhoman Forest (Conservation) Amendment Act chu Mizoramin a hmang mek a, a hman zel a mamawh takzet a ni a ti.

Nimin Sessiona Official Resolution putlulh Forest (Conservation) Amendment Act chungchang sawihonaah he thu hi sawiin Pu Lalduhoma chuan state hmasawna hnathawhna tur a bikin kawnglahi thu ah te Forest clearance la tur in rei tak chai a ngai a, hei hi ramin a tuar a, hmasawna thawh theih a ni lo a ni a ti. Heng harsatna sukiang tur hian Forest (Conservation) Amendment Act hnuaiah central sorkar hotute chu hmun thenkhat National Strategic Importance a puan sak turin a dil a, an phalsak tawh a ni a ti.

Pu Lalduhoma chuan, he dan hi kum 2023 Aug ni 22 ah an dodal a, hemi tum hian a dan amendment act a chauh an dodal a, Article 371 G state sorkar thuneihna hnuaia transfer of land zirchiang lovin, hlau phawt mai ila an ti a ti a, Amaherawhchu Central in he dan a siam hnua notification lo chhuakah amendment rules an siam chu khatihlaia sorkar khan ngun takin an zir a, dodal chi a lo ni lo tiin sorkar hmasa khan ngaihda siamin an dodal thu kha ministry ah a thlen ta lo a ni a ti.

House Leader chuan He amendment act hian state sorkar thuneihna sang zawk a pe a, Forest Rights Act, Mizorama an lo adopt ve tawh, tun sorkarin a adopt that leh chu Forest chhunga chengte humhalhna dan a ni tih sawiin, he FRA hi Forest

(Conservation) Amendment Act hian a pawisaa a zah em em a, Mizote himna tur chu FRA hi a ni zawk a ti bawk.

<><><>

MIZORAM PROHIBITION OF BEGGARY BILL

Mizoram Legislative Assembly thukhawm chuan kutdawh khapna dan siam tur, Mizoram Prohibiton of Beggary Bill a pass.

Nimina Bill pu lut tu Social Welfare Minister Pi Lalrinpuii chuan Mizoram Prohibiton of Beggary Bill chu Karnataka Beggary Act 1975 entawnin, Mizoram milin an herrem tih a sawi a, Social Welfare Department in survey an neihah kutdawh thin mi 30 chuang an awm avangin Mizoram Prohibiton of Beggary Bill chu danah a chan ngei theih nan a pulut tih a sawi.

Minister chuan an bill putluhah chuan local relief board-ah a tul angin NGO leh Kohhran te member an nih theih thu te, kutdawh te chu receiving centre-ah dah phawt an ni anga, darkar 24 chhungin an chhungte hnenah emaw an lo kalna state ah dahkir dan tur ngaihtuah an ni dawn a, haw na tur nei lote chu relief centre-ah dah an ni dawn a, hetah hian anmahni enkawl dan tur ngaihtuah a ni dawn a ti.

Aizawl kawtchhuah Sairangah rel a lo luh theih tawh avangin kutdawh tam tak lo luh theihna a awm ati a, hei bakah hian Mizo khawtlang leh kohhranten mi chhumchhia te an chhawmdawl thin avangin Mizoram chu an tanrual chuan kutdawh awm lohna state ah siam theih a nih thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

OPPSN REACTION TO BEGGARY BILL

Eptu MLA ten kutdawh khapna dan siam tur, Mizoram Prohibiton of Beggary Bill chu thil tul-ah an ngaih loh thu an sawi.

Nimin sessiona Mizoram Prohibiton of Beggary Bill sawihonaah Oppostion Leader Pu Lalthandama Ralte chuan Mizoram thlrin he bill hi House-a pharh a hun a la tih loh thu a sawi a, kutdawh awm lo se tih an duh rualin, kutdawh awm lo turin mipuite changkang thei se an duh thu a sawi a, he bill hian Zo-inspiration leh media hrang hrang kaltlanga mi harsa zawkte tana tanpuina khawn te, krismas leh kumthar inkara vantlang hmuna pawl leh mimal ten zai hmanga tanpuina an khawn thin te pawh khap tel a ni dawn a ti a, tanpui ngai leh dawmkan ngaite dawmkai thinna Mizo nun ze mawi leh Kristian nun mawi khapna tur nia a hriat thu a sawi a ni.

Kutdawh khapna dan hi Central sorkar leh state sorkar ten an siam theih lain, vawiin thlengin central sorkarin a la siam lova, Ministry of Social Justice and Empowerment chuan kutdawhte enkawl leh hmalam hun siam turin hma a lak mek laiin Mizoram sorkarin dan a duanah chuan kawngsira mitdel zai thinte tiamin kutdawhte chu Police ten manin, bond-ah cheng sang 5 a chawitir dawn a, man nawn an nih chuan cheng sing 1 thleng chawitir theih a nih thu sawiin, kutdawhten eitur pawh an neih loh laiin khawia pawisa nge an chawi ang tih leh kutdawh mante pawisa chawi tlingkhawm sorkarin a it em ni tih zawhna a zawt bawk a. Kum 20 liamta atanga Bairabi-a rel a lo luh chhungin kutdawh an lo lut hum hum loh avangin Sairanga rel lo lut tur hlauhthawmah a ngaih loh thu a sawi bawk a, ILP tel lova lo lutte chu thawh thla zawk mai turin a rawt bawk a ni.

BJP MLA DR. K Beichhua chuan Kristian state a nih angin Mizoramah kutdawh khap lova kutdawh tih rem dan tur kawng a awm zawk a rin thu a sawi a, social issues kaihhnawihah chuan India Danpui hnuaiah Autonomous District Council te chuan mahniah dan an in siam thei tih sawiin, he bill in Mizoram pum a huam tur thu chu ennawn leh se tha a tih thu a sawi a ni. He bill hian pianphunga rualbanlote a huam dawn avangin chung mite chu dan bawhchetute ah chhiar an ni dawn nia a hriat thu sawiin, mi chhumchhiate rahbehna ang tih thu sawiin, thlawp harsa a tih thu a sawi bawk a ni.

Congress MLA Pu Ngunlianchunga chuan rel lo lut tur avanga kutdawh an lo lut teuh tur anga ngaih chu thil dik nia a hriat loh thu a sawi a, ILP tel lo chuan tumah Mizoramah an lut thei lova, sorkar chuan chuti lam chu khauh zawkin kalpui se a tih thu a sawi a, kohhran upa a nih ang pawhin kutdawh khapna bill chu a thlawp thei lo tih a sawi a, kutdawhte chu pianphunga rualbanlote an ni a, an duh avanga kutdawh an ni bik lo tih sawiin, Pathian Lalram din tum sorkar tan chuan an bill putluh chu inrem loh a tih thu a sawi a, state dangte chuan lo ti mah se, kristian state kan nih angin tanpui ngaite tanpui tur zawk nia a hriat thu a sawi bawk a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 125-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>